

**SOALAN NO. 17**

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : DATO' HASBULLAH BIN OSMAN**

**[ GERIK ]**

**TARIKH : 9 OKTOBER 2014 (KHAMIS)**

**SOALAN :**

**Dato' Hasbullah bin Osman [ Gerik ]** minta **MENTERI PEMBANGUNAN WANITA, KELUARGA DAN MASYARAKAT** menyatakan bahawa sepanjang tahun 2008 hingga 2010 Malaysia telah mencatatkan 152,182 anak luar nikah atau tak sah taraf direkodkan. Apakah kerjasama yang telah dijalankan oleh pihak Kementerian dalam menangani isu di atas dan kes pembuangan bayi serta apakah tindakan Kerajaan dalam membendung gejala ini.

**JAWAPAN:**

Tuan Yang Dipertua,

Kementerian Pembangunan Wanita, Keluarga Dan Masyarakat KPWKM) memandang serius akan masalah anak luar nikah atau tak sah taraf yang menjadi masalah sosial masa kini. KPWKM sentiasa berusaha untuk memastikan gejala ini dapat dibendung.

KPWKM telah mengambil langkah-langkah berikut bagi menangani isu kelahiran anak luar nikah dengan kerjasama agensi-agensi lain termasuk badan bukan Kerajaan

- i) menggubal Dasar dan Pelan Tindakan Pendidikan Kesihatan Reproduktif dan Sosial Kebangsaan pada tahun 2009. Dasar dan Pelan Tindakan ini bertujuan untuk meningkatkan pengetahuan di kalangan masyarakat terutama ibu bapa dan remaja berhubung kesihatan reproduktif dan kesan negatif akibat perlakuan seksual di luar nikah;

- ii) KPWKM juga telah melancarkan kempen Kami Prihatin dengan kerjasama Kumpulan Utusan Malaysia, Persatuan Karyawan dan Astro Holdings Sdn. Bhd. pada bulan April tahun 2010. Kempen tersebut yang dijalankan secara berterusan bertujuan untuk memberi kesedaran kepada masyarakat, termasuk pelajar-pelajar institusi pengajian tinggi untuk bersama-sama menangani kelahiran anak luar nikah;
- iii) menyediakan talian perkhidmatan iaitu Talian Nur 15999 bagi membantu mereka yang mengandung luar nikah mendapatkan khidmat kaunseling serta mendapatkan bantuan tanpa hadir secara fizikal, termasuk untuk mendapatkan perlindungan; dan
- iv) LPPKN juga, berdasarkan perakuan di bawah Pelan Tindakan Kesihatan Reproductif dan Sosial, telah membangunkan Modul Cakna Diri (Edisi Remaja dan Edisi Ibu Bapa) yang bertujuan untuk memberi panduan kepada remaja serta ibu bapa dalam memahami perkembangan remaja dan meningkatkan kemahiran untuk menangani tingkah laku yang berisiko khususnya berkaitan seksualiti.

Jabatan Kebajikan Masyarakat melalui pejabatnya di daerah bersedia menerima rujukan kes-kes mengandung luar nikah untuk mengelakkan bayi dibuang. Pegawai kebajikan akan menempatkan klien yang memerlukan perlindungan di institusi dibawah pentadbiran jabatan.

Sebagai kesimpulan, langkah-langkah yang diambil oleh pihak Kerajaan dengan kerjasama semua pihak yang berkepentingan, diharapkan dapat mengurangkan gejala kelahiran anak luar nikah dan seterusnya dapat dibendung daripada berterusan.

**MESYUARAT PERTAMA, PENGGAL KEDUA,  
PARLIMEN KETIGA BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN : JAWAB LISAN**

**DARIPADA : YB. Tuan Nga Kor Ming  
(Taiping)**

**TARIKH : 9.10.2014 (KHAMIS)**

**SOALAN : 18**

Minta **MENTERI KEMAJUAN LUAR BANDAR DAN WILAYAH** menyatakan apakah rancangan dan langkah segera Kerajaan untuk membantu masyarakat luar bandar memandangkan kebelakangan ini harga komoditi utama negara seperti kelapa sawit, getah dan sarang burung walit masing-masing telah mengalami masalah kejatuhan harga yang ketara dan ini mendatangkan kesan kepada ekonomi luar bandar.

## **JAWAPAN:**

Tuan Yang Di-Pertua,

Kementerian sedar bahawa situasi harga komoditi yang merosot telah menyebabkan pendapatan masyarakat luar bandar yang bergantung kepada hasil berkenaan terjejas terutamanya bagi komoditi getah.

Sehubungan itu, antara langkah segera yang telah dilaksanakan semasa situasi harga getah merosot adalah dengan memberikan **Bantuan Khas Kejatuhan Harga Getah (BKKH)** secara *one-off* sebanyak RM500 setiap seorang. Bantuan ini telah diberikan kepada pekebun kecil yang berdaftar dengan RISDA dan sebanyak RM154 juta telah diagihkan sehingga 31 Julai 2014 kepada 308,872 pekebun kecil.

Selain itu, langkah-langkah lain yang sentiasa dalam pelaksanaan adalah seperti berikut:

- a. mewujudkan mekanisma pengurangan harga benih dan baja. Sebagai contoh, harga benih RISDA

adalah RM2.33/pokok berbanding harga pasaran RM4.50/pokok. Manakala jumlah pengurangan harga baja iaitu baja RISDA 1 dikurangkan daripada RM1,374/MT (2013) kepada RM1,190/MT (2014), perbezaannya sebanyak RM184/MT dan baja RISDA 4 daripada RM1,448/MT (2013) kepada RM1,100/MT (2014), perbezaannya sebanyak RM348/MT. Pengurangan kedua-dua jenis baja tersebut berjumlah sebanyak RM532/MT;

- b. melalui Program Pembangunan Infrastruktur Pemasaran (PIP) dengan pembinaan Pusat Timbang dan Stor (PTS) serta Depo Simpanan Berpusat yang berperanan untuk memendekkan rantaian pemasaran agar kumpulan sasar memperoleh harga yang lebih tinggi;
- c. mengalakkan kumpulan sasar mengamalkan Amalan Pertanian Baik (*Good Agricultural Practices* (GAP)). Amalan ini berupaya mengurangkan penggunaan tenaga buruh asing sekaligus meningkatkan pendapatan mereka sendiri;

- d. mempergiatkan Program Aktiviti Ekonomi Tambahan untuk memastikan penggunaan tanah yang optimum dengan menggalakkan kumpulan sasar supaya melaksanakan tanaman kontan seperti cili, pisang, nenas dan lain – lain bagi menjana pendapatan tambahan; dan
- e. meningkatkan agihan dividen kepada kumpulan sasar dengan usaha Syarikat Milikan Agensi yang mengoptimumkan kesemua kawasan supaya boleh berhasil sekaligus untuk memaksimakan hasil bulanan/tahunan.